

Speech by

Honourable Smt. Leela Devi Dookun-Luchoomun

*Minister of Education & HR, Tertiary Education &
Scientific Research*

on the occasion of

World Hindi Day 2016

By the World Hindi Secretariat

At IGCIC, Phoenix

14 January, 2016

Aap sabhi ko mera namaskaar...

Mere liyé yé bahut hi khushi awr garv ki baat hain ki ek baar phir mujhé aap sabhi ke saath Vishwa Hindi Diwas samaaroh mé bhaag lené ka, Mauritius aur poori duniya ke Hindi samudaay ke saath jurné ka mawka mil raha hain.

Lekin Béheno aur Bhaiyo,

Iss saal aur pichhlé saal ke samaaroh ke beech mé bahut fark hain. Iss saal main jitni baar ‘Vishwa Hindi Diwas’ aur ‘Vishwa Hindi Samaaj’ shabd soun rahi houn; meri ankhon ke saamné do tasveerein ubhar rahi hain.

Pehli tasveer 2015 (do hazaar pandrah) mé huwé Vishwa Hindi Sammelan ki.

Doosri tasveer 2018 (do hazaar atthaarah) mé Mauritius mé honé waalé Vishwa Hindi Sammelan ki.

Mitro,

Bhopal ka Vishwa Hindi Sammelan, Hindi bhasha ki global taakat ka anokha jashn tha. Mujhé desh ki kayi Hindi sansthaawon ke pratinidhiyon aur Hindi ke vidwaanon aur lekhakon ke saath iss Sammelan mé bhaag lené ka mawka mila.

Iss Sammelan mé Bharat ke Pradhaan Mantri Shri Modi se lekar Bhaarat ki aam jantaa ke dil mé Mauritius ke Hindi Samaaj ke liyé jo pyaar, vishwaas aur izzat dikhi uss-né ek baar phir ye saabit kiya ki Bhaarat se baahar Mauritius wo desh hain jo Hindi ko ek Global

Bhasha banané mé sabsé zyaada yogdaan dé raha hain.

Iss pyaar, vishwaas aur izzat ke kaaran hi, Mauritius ko do hazaar attharaha me aglé Vishwa Hindi Sammelan ke liyé chuna gaya. Yaha hum sabhi Hindi premiyan aur har Mauritius vaasi ke liyé bahut hi garv ki baat hain.

Béheno aur Bhaiyo,

Main huméscha se maanti houn ki pyaar, vishwaas aur izzat paané ke liyé aur ounko kaayam rakhné ke liye bhi bahut mehnat, tyag aur tapasya karni parti hain.

Jahaan humaré itihaas mé Hindi bhasha ke sevakon, lekhakon ki tapasya né aur sarkaar tathaa sabhi sansthaawon ki mehnat né humaré liyé yaha Sammaan haasil kiya

hain. Wahin bhavishya me bhi, aur khaaskar 2018 ke Sammelan me hum sabhi ko apni mehnat ke bal par yaha dikhana hoga ki hum iss sammaan ke kaabil hain.

Vishwa Hindi Samaaj ne Secretariat ki sthaapna Mauritius me karne huwe, aur ab gyarah-waan Sammelan aayojit karne ka mawka dekar ye bataaya hain ki Mauritius ke har Hindi premi se bahut saari aashaayein juri huwi hain.

Issliye abhi se lekar 2018 tak iss desh ke har Hindi premi ka farz banta hain ki wo Sammelan ki taiyyaari me har tarah se sahyog de. Main aapko vishwaas dilaati houn ki Sarkaar aur mere Mantraalay ki or se iss taiyyaari me koi kami nahi rahegi.

Mera ye vishwaas aap sabhi ke kaaran hi hain. Main jaanti houn ki iss aayojan mé aap sabhi Sarkaar ke saath hongé. Ek or meré Mantraalay ke saath juri Vishwa Hindi Sachivalay, Mahatma Gandhi Institute aur baaki Hindi sansthaayein hain. Saath mein meré sahyogi Minister of Arts & Culture ke Mantraalay ke saath juri Hindi aur Bhojpuri Speaking Unions hain. Inké alaawa Hindi Pracharini Sabha, Arya Sabha Mauritius aur desh ki sabhi Socio-Cultural sansthaayein hain. Yahaan mawjood sabhi lekhak gan hain. Aur khaaskar Humaré desh mé Hindi ki sabsé bari taakat, Humaaré Shikshak hain. Tengur Ji aur GHTU ke sabhi sadasya hain.

Isske alawa hum jaanté hain ki Bharat Sarkaar aur High Commission ka sahyog aur guidance humko humesha milta rahéga.

Béheno aur Bhaiyo,

Apké sahyog ko dekhté huwé, mujhé iss baat par koyi shak nahin hain ki hum sabhi milkar Bhaarat Sarkaar aur vishwa Hindi Samaaj ki sabhi aashaawon ko poora kareingé. Mauritius duniya mé Hindi bhasha ke prachaar, usski shiksha aur saahitya ke ek hub ke roop mé apni pehchaan ko aur mazboot karéga.

Excellency Shri Mudgal Ji, aap kripaya Bhaarat Sarkaar ko Vishwa Hindi Diwas ke mawké par humari shubh-kaamna ke saath-saath yaha Sandesh bhi pahunchaayein ki Mauritius iss vishwaas aur sammaan ko

poori vinamrata se sweekaarta hain aur poori nishthaa ke saath sabhi ke swaagat ki taiyyari mé laga hain.

Béheno aur Bhaiyo,

Vishwa Hindi Sammelan ke alawa. Aaj ke samaroh par aaté hain.

Mitro,

Ye samaaroh ek baar phir humaari dharti par videsh se Hindi ke ek baré vidwaan ke swaagat ka awsar lekar aaya hain. Hum sabhi ne Dr. Friedlander ki baaton ko suna aur ye jaankar bahut achcha laga ki Australia aur Pacific region me kiss tarah Hindi ka vikaas ho raha hain. Hum yahi asha karté hain ki Dr. Friedlander ki Mauritius yatra bahut achchi ho aur Mauritius ki

sundar tasveeron ke saath-saath vé apné saath yahaan ke Hindi jagat ke achché anubhav bhi lekar jayeingé.

Ek vishesh Swaagat hum bharat se ayé Shri Ramdarash Sharma aur unki toli ka bhi karté hain. Unki yaatra Bharat ke folk sangeet aur Mauritius ke folk sangeet ke beech ek setu (bridge) baandhné ka mawka hain. Aur main apné sahyogi Minister of Arts & Culture aur Bharat Sarkaar ka iss mawké ke liyé dhanyavaad karti houn.

Ant mé Beheno aur bhayiyo,

Pichhlé ek saal mé mujhé Secretariat ke kaamon ko bahut kareeb se dekhné ka mawka mila. Mujhé iss baat par khushi hoti hain ki ye sanstha hum sabhi ki aashaawon, khaaskar Mauritius aur Bhaarat ki sarkaar

ki ummeedon ko poora karné ke liyé bahut mehnat kar rahi hain.

Ek misaal ye hain ki Vishwa Hindi Sammelan mé mujhé ye ghoshna karté huwé bahut garv ka anubhav huwa ki Secretariat aur uske sabhi sahyogiyon ki mehnat se Mauritius mé shiksha se lekar panditaayi tak Hindi ka prayog karné waalé ek hazaar se zyaada logon ko ICT mé training di ja chuki hain.

Jahaan ek or Modi Ji aur Humaré Pradhaan mantri né Secretariat ke headquarters ke nirmaan ki shuruwaat karté huwé ye saabit kiya ki donon netawon ke liyé ye Sanstha kitna mahatwa rakhti hain. Wahin sachiwalay apné publications, apné aayojan, conferences, apné database aadi ke

maadhyam se yé saabit karta hain ki wo ous vishwaas ke kaabil hain.

Main Secretariat ki iss team ko badhaayi deté huwé yahi aasha karungi ki ye kaam jaari rahéga aur yaha mera vishwaas hain ki headquarters ke ban jaané se Secretariat aur adhik resources ke saath aur adhik taakat ke saath kaam karéga.

Iss saal ke competitions me jeetne waalon ko bahut badhaayi aur Publications me sahyog dene wale vidwaanon ka bhi aabhaar.

Apni baat ko samaapt karté huwé aap sabhi ko meri awr meré parivaar ki or sé nayé saal, Vishwa Hindi Divas aur Sankraanti ki bahut shubhkaamanaayein.

Dhanyavaad.

Namasté.